

**Rundingan Dengan Rakyat Filipina Bersenjata Sedang Dijalankan – PM  
mStarOnline  
Februari 14, 2013  
Oleh MAZWAN NIK ANIS**

**PAPAR:** Pihak polis sedang dalam proses rundingan dengan sekumpulan 80 hingga 100 orang bersenjata dari selatan Filipina yang mendarat di Lahad Datu malam Selasa lalu.

Perdana Menteri Datuk Seri Najib Razak berkata, beliau sudah diberi taklimat oleh Ketua Polis Negara, Tan Sri Ismail Omar dan Ketua Polis Sabah, Datuk Hamza Taib berhubung isu berkenaan.

"Kita sudah kepong kawasan berkenaan dan pihak polis dan tentera mempunyai keupayaan untuk menguruskan perkara ini.

"Kerajaan memilih untuk menangani isu itu melalui rundingan dan mahu kumpulan itu untuk meninggalkan negara dengan aman bagi mengelakkan pertumpahan darah," kata Perdana Menteri ketika mengulas isu itu.

Najib berkata demikian ketika ditanya perkembangan terkini di Lahad Datu berikutan laporan yang memetik Menteri Pertahanan Datuk Seri Dr Ahmad Zahid Hamidi sebagai berkata pasukan keselamatan menahan sekumpulan warga asing menyamar sebagai anggota tentera cuba menceroboh perairan negara di Lahad Datu.

Ahmad Zahid berkata beliau mengarahkan Angkatan Tentera Malaysia (ATM) bekerjasama dengan polis mengambil tindakan segera berhubung perkara itu.

Sementara itu *Bernama* melaporkan bahawa Najib berkata: "anggota polis kini bertindak atau merupakan bulatan pertama mengepong kawasan tersebut dan bulatan kedua terdiri daripada pasukan anggota tentera.

"Dari segi kekuatan, kuasa tempur kita adalah lebih dari cukup untuk memberkas mereka, tetapi kerajaan memilih jalan untuk buat perundingan dengan mereka supaya mereka keluar dengan aman balik ke Selatan Filipina," katanya.

Ditanya sama ada pihak berkuasa keselamatan Malaysia sudah mengenal pasti kumpulan itu, Najib berkata: "Lebih kurang kita sudah kenal pasti".

"Tapi biarlah polis melakukan rundingan dengan mereka dan mudah-mudahan mencapai hasil dan kejayaan. Sebab mereka tak boleh ke mana, mereka dikepung...mereka tidak ada pilihan dan perlu cari jalan penyelesaian," katanya.

Apabila ditanya sama ada kumpulan itu bersenjata atau sebaliknya, Perdana Menteri berkata perkara itu dalam makluman polis dan "jangan buat spekulasi".

"Kita bukan mendedahkan maklumat dalaman...biar polis jalankan kerja mereka tanpa diganggu mana-mana pihak. Apa yang penting keberhasilan yang selesai tanpa pertumpahan darah," katanya.

Mengenai tahap keselamatan dan kawalan di perairan negara terutama pantai timur Sabah, Najib berkata perairan Malaysia amat luas tetapi apa yang penting ialah "kita dapat maklumat cepat".

"Kita mengepung mereka, bila dapat mengepung mereka, mereka tidak boleh ke mana. Kita mesti sedar lautan kita luas dan kita tidak boleh berada di setiap masa sentiasa 24 jam," katanya sambil menambah pihak berkuasa kerajaan Malaysia sudah memaklumkan kejadian itu kepada kerajaan Filipina.

Hakcipta Terpelihara © 1995-2013 Star Publications (Malaysia) Bhd

Source:

[http://mstar.com.my/berita/cerita.asp?file=/2013/2/14/mstar\\_berita/20130214142307&sec=mstar\\_berita](http://mstar.com.my/berita/cerita.asp?file=/2013/2/14/mstar_berita/20130214142307&sec=mstar_berita)